



# 余惠蓮 小姐

客語 · 短篇小說 · 社會組

第三名

得獎作品

## 第二春

## 得獎感言

### 情牽終身好伴侶

古時「三從四德」侷限了女人的一生，但是女人遇到了對家庭沒感情、對妻子沒愛情、對子女沒親情的配偶，就要認命嗎？文內的女主角生活在還沒有探討「性平」的年代，但是她勇敢的為自己抉擇了幸福的下一步。和樂家庭是社會安定的根本，期望找到對的人，恩愛夫妻快樂地情牽一生。

## 第二春

裕玫摻銘祥兩公婆，戴等笠嘛、手袖，著等長褲、工作鞋，摻耕種人完全共樣个裝扮，一前一後行出紅磚瓦屋。

買入這座紅磚瓦屋摻兩分零个農地，已經有六年了，一年當中一半較加个時間都戴這位，附近人家也全部熟事，麼个哥、麼个嫂，喊起來又親切又溫馨，大家對外省籍个銘祥也親暱暱仔，佢對這純樸个農莊生活非常適應，所以兩公婆摻這所在就看做幸福園地，從完全毋曉耕種个都市人，一步一腳印慢慢請教慢慢學習，這下嘎成為搭泥卵个農民哩！

兩公婆行啊行仔到了菜園，今晡日係放寮日，妹子、婿郎、俵仔、心白、孫仔、孫女，還有佢兜个朋友，一大群人都愛來寮；食晝个问题裕玫毋會愁慮，妹子、心白會打算到好勢好勢，見擺都係魚魚肉肉放滄歸桌，食都食毋忒。

莊下地方無都市恁繁華鬧熱，也無像樣个飯店餐廳做得招待佢兜，但係有裕玫、銘祥一鏹頭一鏹頭挖窟仔、親手種个、無洩農藥、無用除草劑、天然又安全个各種菜類，一壟一壟青油油仔；金黃色个木瓜吊到滿樹，啲紅个火龍果，打了一枋又一枋，歸菜園看過去像彩色世界，講有幾錫人就有幾錫人。

想著一群大細愛來，裕玫斬十過隻高麗菜，割一大畚箕韭菜，還有番薯葉、蘆筍……兩公婆歡歡喜喜有講有笑，攞到大樹下開始擇菜。這都係愛分佢兜帶轉去个，菜蓋、黃葉、老梗、蟲食个，都愛揀好擇好，一方面做得減少都市个垃圾量，另一方面擇下來个菜葉倒到火爐堆，一隻月後又變做天然肥料。佢兜非常阿腦農民个智慧，麼个東西都會循環利用，取之於大自然又歸還於大自然。只愛肯做，所享受个都係最天然最上等个物資，怪毋得莊下人個個都顯露出自信開朗，歡喜靨天个笑容；行在路項，八、九十歲以上勇健老人，都會堵著幾下個。

裕玫兩儕像隱居樣，無愁無慮渡等老衰，在這莊下種菜種水果，日仔過來暢樂又自在；想著子女也食得著自家種个菜，裕玫笑到嘴合毋密，佢偷偷仔睇一下銘祥，銘祥也送過來深情个眼神，毋多知仔兩點零鐘就過忒哩。

臨晝邊仔，五臺自用車慢慢駛落禾埕，車門一開，阿太、阿公、阿婆、阿爸、阿姆……喊

到大嫲牯聲，連屋頂都會掀起來樣，細人仔牽等阿太个手又颯又跳暢到耐毋得。

無一下仔，細人仔相爭到食飯間，攞手捋腳就將阿婆炒个青菜兜到桌頂，妹仔心白也拿出準備个好料，兩下半仔兩張桌排滄滄，爌肉、剝盤雞、筍乾豬腳、糖醋魚、花枝炒芹菜、客家小炒、大腸炒薑絲、冬瓜湯、還有粿圓……再加上幾下盤青菜，比做大生日還較澎湃。全家人圍坐食晝，相賽講：好食！好食！看在裕玫眼中，就係上天特別庇蔭歸屋人，這種和諧這種享受，佢滿心感恩。

\*\*\*\*\*

食飽晝，裕玫撈竹筍、青菜、水果排在地泥下，只愛合意个都做得拿轉去；這時，裕玫个細孫女講：「三日毋食青，片重輕。」接等一個孫仔又講：「三日毋食蟲，毋玲瓏。」做阿太儕聽著，大聲講：「息嫲還慶哩！大家愛多食青菜，正會生到又高又大哦！」息嫲個個都講：「知啦、知啦！」

這時，大孫女拿一隻紅包到老哀頭前，其他孫仔尖尖共下，大聲講：「恭祝阿太身體康健、平安快樂！」

啊！今晡日係麼个日仔？又毋係過年，仰送紅包？裕玫毋了解。

接等，俵仔婿郎又拿等紅包，妹仔、心白也共下行到銘祥、裕玫面前，大聲講：「恭祝阿爸、阿媽，白頭偕老珍愛永遠，珍珠婚結婚紀念日快樂！」佢兜朋友也講：「恭祝婚姻幸福，年年歡樂！」到這下裕玫正想起，原來今晡日豐沛个當晝、還拿著大紅包，這兜齣事都係子女預先安排好个；連今晡日係結婚三十年紀念日，自家都毋記得了，毋知銘祥有想起無？做子女个還會想起，實在難得。

\*\*\*\*\*

恬靜个暗夜，裕玫全睡毋忒，行入書房翻開一本古典小說，心想在古人个社會中，尋著有

智慧又生趣个生活方式，對照這茫茫大海樣多變个現代社會，定著有所借鏡參考个所在。奇怪个係，仰般看也都看毋入文，算了算了，合起書，過往个歲月一幕一幕呈現在眼前，清清楚楚、擲也擲毋忒、粹也粹毋去……

裕玫係獨生女，阿爸做零工、阿姆摻人渡細人仔，生活算普通，戴在東部縣市細莊頭。裕玫自細就聰明過人當會讀書，高中以前從來都毋識離開故鄉，無想著考大學，嘎考著了臺北个國立大學，這好消息傳遍歸莊頭，一個工人妹仔，考得著臺北个國立大學？無人會相信！毋過，高中門口布告欄貼出紅色大榜單，大家看了，一傳十、十傳百，證明這消息一切都係千真萬確，裕玫也係這屆唯一上榜國立大學个學生仔。

愛去臺北讀書，毋像在屋下幫幫襯襯一日過一日，生活方式都愛調整，衫褲鞋襪、棉被眠帳、面盆牙搓仔……想得著个所有用品，全部愛一一置辦，還愛買一隻大皮箱，將這兜東西張入去。

學校入學通知書接著了，詳細看過以後，好在遠到新生優先分配學校宿舍，宿舍費係一般外背出租套房个三股一，裕玫爺哀心肝頭个大石牯正放下來。

新生註冊前兩日，阿爸阿姆陪等裕玫到學校，闊闊个宿舍區，有高高个大樹，花園有各色各樣个花樹，毋過這時係熱天，毋係開花期。盡多新生也來了，裕玫由偏遠个莊下來到這鬧熱个城市，有一滴仔心焦又有無限个期望。

\*\*\*\*\*

大學課程非常充實，裕玫了解爺哀經濟能力，四年時間定著愛好好把握，毋好遊蕩搞寮。摻其他同學共下研究虛心請教，毋了解个會再請教授說明清楚。過去讀高中時，長透聽著大學生活係「無愁無慮，由你快樂搞四年」，實際入學以後，這講法完全毋著，每個同學都認真學習，除了主修科系還有人雙主修，又還有人係選輔修科系，逐個都拚到有日無夜。

大學生活裕玫摻其他同學又有一息息無相同，除了正課認真之外，假日時光男女同學相約出去遊寮，佢罕得參加，自家一儕到圖書館看書，還不時到書店尋資料，充實各方面知識，希望畢業就有法度就業，莫分阿爸阿姆過度勞累。

四年時光真遽過去，裕玫畢業了；畢業後，帶著後生人敢向前衝向前拚个精神，參加公職

人員考試，兩隻月後放榜，竟然榜上有名。這母係天頂跌下來个等路，係佢四年大學期間認真學習、分分秒秒煞猛精進得著个成果。

選填服務志願時，佢完全無考慮，就選了人人認為摻北部比起來，偏遠又落後个東部縣市，轉到熟事个故鄉，做人事管理員。

\*\*\*\*\*

轉到故鄉食頭路个裕玫，懷抱一股熱心理想，做事謹慎真誠，母曉个會請教高級主管，對同事所有應享權益，無一項失漏，雖然係新腳仔，做起事情母會輸過去个人事長輩，同事都講後生可畏，新人新氣象，摻歸隻機關環境帶到活跳新鮮个境地。

就在家庭團圓，裕玫工作穩定時節，突然傳來个信息，實在分佢承受母核，歸隻人像跌落深井……厥爸在工地發生意外，到醫院急救前，已經無氣無脈，失去了性命。

裕玫心中不平，怪怨上天無眷顧佢一屋人！佢係事業个新鮮人，前途無可限量，只愛認真，應該有平步青雲向上發展个機會，這下受著這打擊，情何以堪？阿爸辛苦一生人，維持家庭溫飽，還培養佢受高等教育，上天仰愛奪走阿爸个性命？阿姆渡細人仔有愛心，渡大个細人仔成人長大了，還不時轉來尋乳哀，恁有責任心个好乳哀，仰會受著半路斷擔竿个命運？

阿爸阿姆都五十大零，做得放下工作，接受佢个孝心了，佢也安排兩老半年後躋團旅遊，出去外國體驗無共樣个風俗民情，欣賞摻臺灣無共樣个山光景色；這下全部破滅，靚靚世界化成悽慘景象！

足足兩年，裕玫心神母定，一切都失落了，人事工作不時會處理母清楚，還愛同事提醒；佢恨自家命薄八字又輕，摻阿爸个父女緣只有短短二十空年；轉頭再看阿姆落一身肉，像八十歲个老阿婆，再也無心思渡細人仔，日日發塚呆三步門都母出。

這時，裕玫突然想著自家忒自私了，阿姆失去老伴，從來母識去安慰去關懷，屋下狼離狼犁也母會整理，顛倒嫌阿姆懶尸母做事；佢係有幾不孝、幾刺傷阿姆創傷个內心？行到阿姆間肚，伸出雙手摻阿姆拗等，大聲嗽出來，兩子哀四目對流，兩年來个鬱卒心酸，像大壩个洪流，盡情流去。

\*\*\*\*\*

在一擺縣內人事人員會議，主辦單位一位工作人員丁文順先生，七日會議中安排到非常周全，參加人員個個滿意，裕玫心中也留下深刻印象。之後經過同事傳來消息，丁先生有意尋佢做朋友，詢問裕玫意願；裕玫想，佢會恁堵好？心中欣賞個人毋就係丁先生咩？盡遽兩儕就行共下了。

文順講，佢係僑生身分來到臺灣求學，畢業以後無轉僑居地，留在臺灣工作。兩儕認識之後，日日下班都相約見面，到了假日差毋多都去海脣看大海。佢兜有共同個興趣，就係喜歡海洋文學：有關海洋冒險、海洋科學、海洋保育、海洋島嶼資源，都係共同個話題；裕玫看等闊闊無邊無際個大海，快樂個心情隨等海浪傳送到遠遠個所在，轉身又看著文順充滿無限情意個目神，一陣暖流由心肝肚升起，佢希望兩儕共下永久享受這美好時日！

文順又講起，太平洋東片就係佢個僑居地，阿公後生時節，就渡等子女移民過去從商，阿爸阿姆結婚後，接手阿公個事業，一路里來事業非常順利又大棚，到佢這代已經係移民第三代，阿公不時講起「水有源樹有根」，雖然西方文化先進時尚，但毋合祖輩篤實個倫常，就安排文順以僑生身分申請來臺就讀，以後也順利尋著工作。

文順不愧係見過世面個人，對裕玫細心細意款待，堵著長假還安排出外旅遊，有名個景點、遊樂區，都有兩儕身影。日日相處不時見面，裕玫哪堪文順個甜言蜜語、風情萬種？戀愛滋味在中心發芽滋長，最後在同事朋友祝福之下，行入禮堂完成人生大事。

婚後老哀還係跔等裕玫生活，一家三口和樂融融，兩人相處在新婚個快樂生活之中。無到半年裕玫肚皮慢慢凸起，愛個結晶會來報到哩啲！一家人暢樂無比，日日期待新生命來臨。

裕玫初次有身，心情、身體個變化非常無鬆爽；但係，文順慢慢性體也變了，認為婦人家生養子女係天經地義個責任，無必要日日呻生呻死怨東怨西，文順無安慰裕玫無打緊，顛倒還輒常外宿毋轉屋，這行踏實在分裕玫無法接受，不時尋老哀出水，大聲哆佢、抨東西，舞到屋下無安無樂。老哀看在眼中十分心痛，佢會婿郎會有恁大個改變？係哪環節出問題？佢也看毋出。

就在嬰兒仔出世前一隻月，文順向裕玫提起，愛轉去僑居地辦事情，聽著這句話裕玫強強會昏忒，這係麼個意思？在這時節老公竟然愛離開，毋陪在身邊？裕玫再多目汁，丈人哀再多懇求，文順心意已定硬起心腸，一禮拜後就離開臺灣，飛轉太平洋該片僑居地了。

\*\*\*\*\*

這係當得人惜个嬰兒仔，雖然係細阿妹，但，目神、面頰卵、嘴脣、耳砵，摻文順就像板印印出來个。產假過後愛轉單位上班以前，翕了幾下張相片，再寫淦淦三張信紙个航空信，寄分文順。

等啊等仔，半年後正接著文順个回信，簡簡單單無幾多隻字，只吩咐愛好好照顧細人仔，對裕玫兩子哀全無半句聞問。

單位工作複雜又多變化，好在有老哀照顧細人仔，無像其他同事為著愛尋乳哀，除了花錢還愛擔驚受怕，只驚細人仔無受著安全个照顧；毋過，大家都係爺哀共下經營一隻完整家庭，渡等細人仔享受快樂家庭生活；只有裕玫單人獨馬母兼父職，半夜想起目汁濫泔心事連連，想當初也係自家忒過迷痴，摻文順交往期間，就像高貴个千金小姐，愛聽个係佢像蜜糖樣个話語，連佢个阿爸、阿姆个相片也毋識看過；結婚該日，爺哀戴恁遠無出席就算了，男家頭連遠房叔公阿伯、兄弟姊妹都無半個到場，主婚人還係佢个頂頭上司，這下文順走到萬里外个所在，連鬼影也看毋著了。

\*\*\*\*\*

一日暗晡食夜時節，一陣推門聲傳來，奇怪？恁夜了係麼人？門一開，裕玫摻老哀都著驚了，原來係文順轉來！

裕玫大聲問：「哪時節轉來？」

「轉來半隻月囉！」

「該你戴哪位？」

「戴在臺北。」

裕玫聽了，毋知哪來个勇氣，巴掌嫵擎啊起來，對等文順嘴角就盪啊過去，文順摸等嘴角、目珠擘大大，聲都毋敢聲，這時妹仔已經五足歲。

停留半年後，文順又愛離開，裕玫發現自家又攞大肚了。

\*\*\*\*\*

懷胎十月，嬰兒仔來報到了，這擺降著俾仔哦！裕玫非常歡喜，毋過，體認真看，還孤盲！  
摻做爺仔个生到共樣共樣，一滴都無跌忒！命啊！運啊！

以後个日仔，裕玫無再對文順有任何期待，有老哀渡細人仔，佢就認真準備升級考試，最後由人事管理員晉升為人事主任，還有助理分擔工作。

妹仔、俾仔盡乖，聽話又認真，國中畢業後，都到臺北讀高中；丁文順也應裕玫要求，轉到臺灣辦理離緣手續，結束這十過年，對舖娘無愛情、對子女無親情，完全無實質意義个空殼婚姻；裕玫同時申請改調北部任職，萬般難捨个離開養育佢、但又分佢心碎个故鄉。

\*\*\*\*\*

北部資源比起東部實在加盡多，交通又利便，朋友之間互動頻繁、親切，裕玫到新單位上班得心應手，助理認真負責，交代个事項做到清清楚楚；兩個子女連續考著大學，到這下裕玫正有感受人生个價值。

\*\*\*\*\*

人事主管公費參訪活動，辦理十日出國行程，裕玫從無出國過，佢期待、歡喜个心情，像小學生愛上臺領獎共樣，希望出國日期遽遽來臨，同事王小姐也自費同行。

十日之間，看著無共樣个異國景緻，了解摻臺灣無共樣个歷史人文；一輪參訪分佢眼界大開，也學著了外國科學辦事个方式，佢受益盡多非常滿足。

參訪結束轉到臺灣無幾日，王小姐竟然講愛摺裕玫介紹男朋友，裕玫笑到會死，拍拍風講出一句無頭無尾個話；但，王小姐露出真心真意個表情：「佢講正經個，就係這擺共下出門個范銘祥。」

范銘祥？范銘祥？慢慢仔、慢慢仔，裕玫想起二十幾年前初任人事工作，到臺北接受培訓時節，有一個同期學員就安到范銘祥，敢係佢？這擺參訪完全無注意這個人，毋過心想交朋友就交朋友咩？有麼個相干，經過紹介，兩儕慢慢仔互相了解。

\*\*\*\*\*

范銘祥確實就係以前培訓時節同期學員，五年前舖娘過身，有一子一女，目前已經大學畢業開始食頭路了。

銘祥雖然對裕玫盡厚意，但，裕玫並無像後生時節，對愛情有詩情畫意個期待，佢愛慢慢思考，腳步穩穩踏出。經過半年交往，雙方對家庭情況也了解，銘祥係一個真心可靠個人，向裕玫提出結婚個要求；裕玫想起自家已經一擺跌落深深個坑壠肚，差一息就會蹶毋起來，無希望有第二次傷害，所以還愛考慮清楚。

佢首先摺老哀講這件事，老哀講對頭愛有正當個家庭環境，人愛老實做得佷憑，係再堵著流流漂漂嘴甜舌滑，只會講好話個落仔，就毋堪哦！佢又再詳細講清楚銘祥個家庭情況，老哀也就放心了。

一關過忒還有一關，裕玫再摺妹仔、俵仔講起銘祥，最後問講：「阿姆想愛再婚，你兩儕會同意無？」兩個子女聽了，同時講出：「好、好！同意、同意！」

就在王小姐安排之下，選一個黃道吉日，摺另一位朋友，共下陪同銘祥、裕玫，還有四個後生仔也踉等，到戶政機關登記結婚；兩禮拜後邀請至親好友辦了五張桌席，同享銘祥、裕玫再婚宴會，大家都恭祝兩儕雙竹透尾恩恩愛愛，行出人生久久長長個未來時光。

原本孤孤栖栖個兩家人，一下仔成為鬧熱個七口之家，銘祥還多了一個阿姆！兄弟姊妹都非常歡喜，互相友愛相惜，銘祥大俵仔係大哥、妹仔係大姊，裕玫個妹仔係二姊、俵仔係細老弟。

到這下，裕玫正有家庭溫暖个感受，毋過，也已經四十四歲了。

\*\*\*\*\*

新家庭新氣象，兩公婆歡歡喜喜繼續在不同單位上班，四個子女也都事業順利成家立業了，分別係醫生、生理人、教育工作者、工程師；婿郎、心白也有穩定个頭路。

十過年後兩公婆退休，帶等老衰四處旅遊，國內、國外走透透，過著寶貴个時光。

六年前全家人踅等老同事到莊下露營度假，車仔駛在鄉道，經過一坵農地，大大个廣告看板寫等：「農地農舍出售」，四個後生仔看著農地恁闊、價數又合理、農舍也合意，就記起地址、地號、連絡電話；三隻月後，辦好一切手續，佢兜就擁有這屋舍摺農地了。

農地荒廢幾下年，利用假日全家動員整地、整屋，正慢慢仔整理出像樣、排場有規模个面貌。

裕玫、銘祥安定以後，四處認識環境、拜訪鄰舍，還請教耕種方法，兩儕慢慢體會，漸漸仔也有耕種个基本心得了。

以後發現鄰舍朋友年歲偏大，子女無轉來時節都盡孤單沒落，兩老摺子女參詳，就買幾張大型桌凳放在橫屋，作為鄰舍坐寮、打嘴鼓个空間，還安了卡拉 OK 伴唱機分大家唱歌；再進一步，裕玫希望子女各人依照專長，輪流為鄰舍長輩做基本生活常識个說明，子女也心甘情願个答應。

大俵仔第一擺講保健要領，橫屋坐淦念，大家踴躍發言、提問，最後還歡歡喜喜一儕拿一份西點細禮盒離開；裕玫、銘祥非常滿意鄰舍个熱情光臨，對俵仔貼心準備也十足安慰。

接下來婿郎、心白又分別講著：選購物品常識、環保概念，教畫圖、寫水筆字、詩詞欣賞、心靈課程、居家安全注意事項……恬靜个農舍嘎變到像銀髮族活動中心，逐擺還有炒米粉、粿粿、粿圓、米篩目、水粿、糕餅……無共樣个免費點心做得品嘗，係堵著裕玫、銘祥有其他安排，當禮拜活動正會取消。

一屋人摺歸莊鄰舍結合成一體，大家來來去去感情和順；子女摺鄰舍交流之中，了解莊下人真誠開朗个心胸，願意持續關懷佢兜；裕玫也相信透過無共樣个服務方式，對子女做人做事个

態度摻眼光，一定有助益。

\*\*\*\*\*

裕玫想著老哀講个：「有緣久別重相逢，無緣對面不相識。」有影！這下有婿郎、俵仔、妹仔、心白、孫仔、孫女歸家人做伴，填補過去所有个缺陷摻不足；對老哀來講，九十幾歲个人生，到這下也算係得著慢來个圓滿哩！

大家都相信命運掌握在自家手中，但，只愛一时无恹真，腳步就會行偏差，過去个坎坷裕玫已經毋再怨嘆，三十年來摻銘祥真心相待平靜過日，佢期待：還愛兩儕手牽等手，再行十年、二十年、三十年……就像無雜色个珍珠，永遠白雪雪、金皙皙，發出戔人耀目个光芒，照亮人生路途，享受越來越甘醇个人生第二春。